

新疆圖志卷一百十四

人物二

流寓

謹按流寓而附諸人物古無此例也惟新疆地處邊荒自漢唐以來除出征將士遷謫流人蹤跡恒不到此是以窮蒐史冊卓卓可傳者代不數人專作一編竟難成帙爰附諸人物之後而以上著流寓相輔而行庶免簡單之狀焉閱者諒之

史遷伯夷列傳云伯夷叔齊得孔子而益彰言幸有人傳述也然考夷齊軼事稱述至今者多在去國以後西山窮餓之時卽孔子亦以半生客寄聞名諸侯自古傳人無溫飽家居不出里閭者豈不然哉豈不然哉新疆自漢始通彼時都護有生還之望翁主作愁思之歌固自古視爲羈旅之鄉也迨至

本朝例處謫宦其間名人碩士多寄跡於荒涼寂寞之區而流風餘韻轉得父老傳述遠夷稱道往往歷百數十年猶嘖嘖於人口烏乎身後之名有幸有不幸如是者其幸耶其不幸耶茲網羅古今得若干人載之簡冊庶幾不朽云爾

上古

黃帝居於崑崙之墟

商

彭祖姓彭名錢顓頊之元孫善養生歷商周年七百六十而不衰

嘗流寓西域百有餘年後仕商爲守藏吏仕周爲柱下史

論語疏及神仙傳

周

李耳字聃久居西域相傳于闐國城西有比摩寺是老子化胡成佛之所

漢

張騫建元中以郎應募與堂邑甘奴父使西域月氏十三載還漢拜騫爲大中大夫拜堂邑父爲奉使君元朔六年騫以校尉從將軍出擊匈奴迺封騫爲博望侯後使烏孫與烏孫使數十人

來報謝拜騫爲大竹

李陵廣之孫也天漢二年陵擊匈奴至凌稽山遇匈奴三萬騎殺數千人軍無後援矢盡糧竭敗降匈奴單于以女妻陵立爲右較王與衛律俱貴用事今哈密城東十餘里馬驢山望鄉嶺相傳是李陵題字處

郅支單于自以道遠又恐謹擁護呼韓邪而不助已困辱從使者江刀始等遣使求侍子漢議遣衛司馬谷去送之復爲所殺自知負漢又聞呼韓邪日強恐見襲擊會康居遣使迎之妻以女甚尊敬之欲倚其威郅支數擊烏孫至赤谷城烏孫西邊東虛不居者五十里

蔡愔仕漢爲郎中孝明帝八年奉命之天竺求佛經居久之立白馬寺於雍關西邊

竇固仕漢爲奉車都尉明帝十六年奉命出酒泉郡破呼衍王於天山留屯伊吾盧城

新疆圖志

人物二

二

甘英爲定遠侯班超掾時西域五十餘國悉內屬其條支安息蒙奇兜勒四萬里外皆重譯貢獻超乃遣英窮臨西海凡前世所不至山經所未詳一切山川氣節物類人風莫不備寫情形傳

爲珍怪焉

後漢書

晉

段業京兆人爲苻秦將呂光參軍從攻龜茲入其城見宮室壯麗

作龜茲宮賦以譏之

十六國春秋

魏

韓安保於太和三十一年高昌王馬儒表求內徙高祖納之遣韓安保赴之割伊吾五百里以儒居之

隋

薛世雄爲玉門道行軍大將孤軍渡磧初伊吾謂隋軍不能至皆不設備及聞世雄兵已渡磧大懼請降世雄遂於伊吾城東築城曰新伊吾

裴矩使西域自敦煌至西海其道有三南道從鄯善今瑪海于闐今和闐

朱俱波今英吉沙爾喝盤陀今色勒庫爾度葱嶺達西海即漢時南道中道從高昌今吐魯番

焉耆今喀喇沙爾龜茲今庫車疏勒今喀什度葱嶺達西海即漢時北道今之南路北道從伊吾

密今哈經蒲類海今巴里坤鐵勒部突厥可汗庭在今烏魯木齊地渡河北流今迪化西行至伊犁水皆北流至

佛赫國即漢時條支唐書以為大秦國非也今為如德亞國達於海即今北路又按愛烏罕為漢大月氏再西為默克等部海即地中海

王威隋銀青光祿大夫也從薛世雄軍渡磧降伊吾世雄乃築新

伊吾城留威以甲兵守之

唐

岑參以詩鳴名埒李杜初辟磧西節度幕府途中有赴北庭度隴

思家詩公餘吟詠有晚泊蒲類等詩後官嘉州刺史世稱其詩

為嘉州體

杜環杜佑族子天寶中安西副都護高仙芝表為幕僚從攻勃律

仙芝凱旋環獨歷遊至西海寶應初乘商舶自廣州還撰經行

記一卷唐書

新疆圖志

人物二

三

契苾何力母姑臧夫人與弟沙門在涼州沙門為賀蘭都督十六年詔何力往視母薛延陀毗伽可汗方強契苾請諸酋附之乃脅其母弟使從何力驚謂其下曰上於爾有大恩且遇我厚何遽反皆曰可敦都督去矣尙何顧何力曰弟往侍足矣我義許國不可行衆執之至毗伽牙下何力箕踞拔佩刀東向呼曰有唐烈士受辱賊庭邪天地日月臨鑒無志卽割左耳示不屈毗伽怒欲殺之其妻諫而止何力被執也或讒之帝曰何力入延陀如涸魚得水其脫必遽帝曰不然若人心如鐵石殆不背我會使至言狀帝泣下卽詔兵部侍郎崔敦禮持節許延陀尙公主因求何力乃得還

五代

供奉官張匡業於天福二年于闐國王李天聖遣使馬繼榮來貢晉遣匡業假鴻臚卿彰武節度判官高居誨為判官册李天聖為大寶于闐國王是歲冬十二月匡業等自靈州行二歲至于

闐七年冬乃還

五代史西域傳

晉

楊宣爲沙州刺史疆理西域宣以部將張植爲前鋒所向披靡軍次焉耆焉耆王熙拒戰於賁崙城西進屯鐵門未至十餘里熙又率衆要之於遮留谷植將至或曰谷名遮留恐有伏焉單騎嘗之果有伏發植擊敗之進據尉犁

晉西戎傳

匡鄴西行入仲雲界

仲雲在沙州西其牙帳居胡盧磧小月支之遺種也

漢明帝時征匈奴屯田於伊吾

盧蓋其地也

宋

王延德使高昌歷伊州州將陳氏其先自唐開元二年領州凡數十世唐時詔敕尙在次歷益都次歷納職城在大患鬼魅磧之東南望玉門關甚近

元

萬戶綦公直至元十八年戍巴什伯里自大和嶺至巴什伯里置

新疆圖志

人物二

四

新站二十年立巴什伯里和州等處宣尉司二十三年遣侍衛新附兵千人屯田巴什伯里置元帥府卽其地以總之

明

主事肯徹洪武二十四年命肯徹使西域以書諭吟第爾和卓成祖卽位之冬遣官齎璽書綵幣使其國

李達於永樂六年齎敕往喀什噶爾國王至卽奉命十年遣使入貢方物

指揮劉福天順七年奉命使喀什噶爾其貢使亦不能常至國朝

法海字淵若漢軍正藍旗人忠勇公佟國綱次子也由翰林檢討累官兵部尙書性伉直權貴多嫉焉雍正四年坐事發西陲水利處效力在戍嫗臥土室中枯寂如老僧及見王公大帥動以義相責皆人所不敢言者九年

召還乾隆元年賞給副都統銜管理咸安宮事務旋卒

先正事略

吳士功河南光州人由臺練洊歷疆圻多所建白其疏草略見皇朝奏議中乾隆二十六年巡撫福建坐事發巴里坤效力明年捐資贖罪歸漢名臣傳

畢沅字纘衡一字秋帆江蘇鎮洋人乾隆二十五年進士廷對第一授修撰嘗以甘肅道員從總督出嘉峪關察看屯田自木壘河至濟木薩往還數千里途中多紀行詠古之作後官兩湖總督有靈巖山人詩文集先正事略

紀昀字曉嵐河間獻縣人由編修洊擢侍讀學士乾隆戊子坐漏洩運使盧見曾事謫戍烏魯木齊有烏魯木齊雜詩百六十首藉瑣事以寓勸懲深合風人旨趣辛卯

召還官至禮部尚書協辦大學士諡文達生平貫徹儒籍通達政體爲一代碩儒名臣云先正事略及文達集

曹麟閣安徽貴池人官湖北黃梅知縣乾隆四十六年緣事戍烏

魯木齊有塞上竹枝詞新疆紀事詩數十首爲時傳誦三州輯略

新疆圖志

人物二

五

周恭先字素芳一字平山湖南新化人乾隆丙戌進士選雲南建水知縣有富人犯羅宜抵而讞已定將出之矣恭先至閱讞牘曰是不宜出吏挾前令畫稿固爭則力斥之其夜囚家懷重金求緩竣卻之持益力因盡駁前讞問如律大府劾以故入人罪遣戍烏魯木齊在戍吟詠自適所爲詩斂才鍊氣醞釀深醇雖遭意外貶斥而無激烈譙殺之音其所養有非尋常所及者閱十年始釋歸歸後躬耕自給足跡不履城市學者稱平山先生

沅湘耆舊集

吳熊光字槐江江蘇昭文人官兩廣總督以英吉利兵船寄內洋未調兵驅逐逮問戍伊犁著有伊江別錄紀所見聞滿漢名人言行多後進未聞者逾年

特旨召還授武選司主事尋乞病回籍道光戊子重宴鹿鳴加

四品卿銜先正事略

洪亮吉字稚存陽湖人乾隆庚戌進士第二人及第嘉慶元年以

咸安宮官學總裁官乞病歸瀕行上書成親王及各當軸言時事語多狂直成親王以聞落職謫伊犁明年京師旱減釋軍流不雨出安西南黎氏二臣於獄又不雨乃

手詔赦亮吉是日沛然雨御製得雨詩有亮吉原書無違礙句並將其書製潢成卷視若良規

聖主之容直臣超越前古而亮吉諒節實亦上格天心云在戍不及百日著有萬里荷戈集天山客話二編既歸自號更生居

士

先正事略

海起雲烏魯木齊參將也言昔征烏什時戰罷還營見崖下樹榦間一人探首外窺疑爲間諜奮矛刺之中石上火光激迸矛折臂幾損疑爲日眩然矛上地上皆有血迹不知何怪紀昀曰此必山精也深山大澤何所不育乎

節錄閱微草堂

伍彌泰前烏魯木齊將軍也烏魯木齊城西有深林老木參雲蔭

蔚彌瓦數十里有小湖彌泰於湖邊建一亭曰秀野亭

節錄閱微草堂

新疆圖志

人物二

六

御史觀成與紀在烏魯木齊將軍幕軍吏具文牒數十紙捧墨請判曰凡客死於此者其棺歸籍例給牒否則魂不得入關以行於冥司故不用朱判其印亦以墨昀視其文鄙誕殊甚以爲此胥役託詞取錢耳啟將軍除其例句日後或告城西墟墓中鬼哭無牒不得歸昀斥其妄又數日或告鬼哭已近城斥之如故又幾日昀所居牆外醜醜有聲昀謂成曰余向以爲胥役所僞爲近數日鬼哭已至窗外矣成曰公所持理正雖將軍不能奪也然鬼哭實所共聞不得照者恐亦怨公盍試一給之倘鬼仍如故則公益有詞矣勉從其議後竟寂然

韋佩金字友山江都人積學能詩由進士選廣西知縣嘉慶四年以貽誤軍情發伊犁効力楊芳燦芙蓉山館文鈔有送其出關

駢文序傾佩甚至其爲名流心折如此

芙蓉山館集並三州輯略

宋吉祿軍吏也在印房忽暝仆久而後蘇云見其母至俄台軍以官牒呈視則哈密報吉祿之母來視其子卒於哈密途次

李鑾宣字石農靜樂人官雲南提刑使嘉慶十二年緣事謫迪化州有荷戈集詩草陽湖惲敬爲之序賜環後官終廣東提刑使

大雲山房文集
並三州輯略

平準噶爾時有從征將士名烏魯木齊者自言初生時其父夢見其祖語曰爾所生子當名烏魯木齊並指畫其字以示覺而不省爲何語然甚了了姑以名之不意從征至此竟久留居焉後

遷印房主事卒於官署

節錄閱
微草堂

孫馨祖江西萬載舉人爲閩甌甯令嘉慶間戍伊犁年近七十矣老竄窮荒猶耽吟詠有昆都侖歌爲知音所賞又爲徐松作新疆賦序

方桂烏魯木齊流人子也言嘗牧馬山中一馬忽逸去躡蹤往覓隔嶺聞嘶聲甚厲尋聲至一幽谷見數物似人似獸周身鱗皴班駁如古松髮蓬蓬如羽葆目睛突出色純白如嵌二雞卵共按馬身嚙其肉牧人多携銃自防桂故頑劣因升樹放銃物悉

新疆圖志

人物二

七

入深林去馬已半軀被啖矣後不再見迄不知爲何物

李亨特官河道總督嘉慶間戍伊犁先是惠遠城在大河北岸以柳圉給石遇漲輒壞水漱齧將及城濠亨特創築挑水土壩長六十餘丈迎溜築掃鑲護水至掛淤衝刷之患遂息二云見松筠奏疏

顏檢字岱雲官直隸總督嘉慶十二年戍烏魯木齊歌詠適情不戚戚於遠謫有古今體詩數十篇載三州輯略中

徐松字星伯大興人嘉慶壬申以編修謫戍奉將軍松筠檄度木素爾嶺周視南疆而由烏魯木齊返伊犁於是以身所歷證之簡編著爲新疆水道記西域傳補注新疆賦諸書詳覈宏麗近世言西域者舉莫能及焉釋還後與修新疆識畧賜中書官甘

肅甯夏知府

德享郎中也因事遣戍烏魯木齊夏日散步城西至秀金亭納涼處稍久忽聞大聲曰君可歸吾將宴客狼狽奔回告紀昀曰吾其死乎乃白晝見鬼詳言其故昀曰無故見鬼自非佳事今在

林木深蔭之中旅櫬浮厝者不可勝數乃鬼窟也於鬼窟中見

鬼有何怪焉

節錄閱
微草堂

祁韻士字鶴皋山西壽陽人官翰林編修嘉慶間戍伊犁著萬里行程記一卷新疆要略四卷西域釋地二卷

方士淦定遠人征張格爾之役從甘督楊遇春出關戊子春由伊犁東歸著有日記一卷紀沿途山川風物焉

田耕野統兵駐巴爾庫爾時軍士鑿井得鏡製作精妙銘字非隸非八分似景龍鐘銘惟土蝕多剝損甚寶惜之常以自隨歿於

廣西戎幕時以授田香谷傳至香谷之孫忽失所在後有親串弋氏於市上得之以還田氏失物復得可見物各有主也

節錄閱
微草堂

林則徐字少穆福建侯官人官兩廣總督道光二十三年以征勦洋艘獲譴戍伊犁明年將軍布彥泰奏請飭辦開墾事宜則徐乃履勘南疆八城暨土魯番境相度川原形勢隨宜濬導水利大興請將各城可墾荒地給無業回民承種並請改屯兵爲操

新疆圖志

人物二

八

防均如議行而其溥利於無窮尤以創鑿土魯番坎水爲最土魯番爲古火州其地亘古無雨澤周禮用水作田之制無從施設則徐思得一法命於高原掘井而爲溝導井以漑田民間名之曰坎遂變赤地爲沃壤焉二十五年

召還後以欽差大臣辦理廣西軍務卒於途諡文忠生平敷歷中外勲業爛然粵東燒煙之役以功獲咎咸豐元年

特旨獎雪其忠蓋蓋久邀天鑒云

黃冕字南坡湖南長沙人由州縣洊擢監司道光中以洋務案發土魯番效力大興伊拉里克水利初林則徐創鑿坎水事未竟而賜環去土性滲漏水澤易竭冕令民以敗氈墊渠底始得灌漑優渥至今父老感念遺躅猶稱道弗衰云

陳孚恩江西人累官兵部尙書咸豐間在籍團練力保省垣同治元年坐與載垣交往謫戍伊犁四年以協守伊犁出力詔免罪仍留辦兵餉事宜明年正月惠遠城陷爲賊所戕